



# Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir\_yimym



tir yimym

TAPAK 8

Iran-i ita ishika tsüngta uranium enrichment tenzükshitsü akok: IAEA chief

China football team Coach Ivankovic mapa nungi anentsüogo

VOL. XXII ISSUE NO. 256 (ADOK 256)

DIMAPUR

TENTONÜ (MONDAY)

AAMI (JUNE) 30, 2025

₹ 5.00

## Naga nunger tarutsü jenjang wazüka ayutsü asoshi ajaki inyaksüla: NIPF & DNSU

**Dimapur, Aami/June 29 (TYO):** Nagaland Indigenous Peoples Forum (NIPF) tir Dr. T Lima Jamir den Advisor Dr. Temsuwati, tongti zülur Kikheto Sumi aser tatong tir Keneiletou Zumvu nungeri anir ketdangsür temi June 27, 2025 nü Dimapur Naga Students' Union (DNSU) indang office nung DNSU lenirtem den sensaksemba senden ka mena liasü.

Iba senden nung tang Nagaland nung tensa balala aser talisa Dimapur, Chümoukedima aser Niuland district tem nung rangloker parnoki jembishinüa liasü.

NIPF aser DNSU ajanga ozüng amshir aser administration tem dang ILP agütsü dang yimya shidak amshitsü ayongzüik aser nüburtem/village councils tem dang non-locals atema guarantor kuma yangludang mesüra NOC agütsü dang kanga kumdanga inyaksangshitsü ayongzüka liasü.

Tarutsü anogo nung lanur lispour aser Naga nunger ajunga ajungtsü aser jenjang tajungba wazüka ayutsü mechi DNSU-i iba tongtipang inyakyim nung temulung agütsüba asoshi NIPF-i pelaba lemsatsep aser yaritsü ta ashi.

Forum-isa DNSU dang ochi nung tasü ita nokdaksü ajungshia liasü aser tensa balala nung

memetsüdahtsü/malangtsü ashi.

Kidang yariteper nungi tenzüka shishilempaba tashinung lisopur masüba nisungtemi Naga nunger mashi lenmang nung anisaogo aser Naga nunger rongsenketzüng nung kanga mejungi akoksatsüogo aser tang parnoki temulung ulua asen ali rongsen aser ali amshitsü meranger, ta telok ana yagi ashi.

Tanübo item nisungtemi taila benami land transaction mapa inyaker, koba lisopuri kanga junga shisadangtsü nüngdaker, ta ashi.

Tripura aser Assam ama asen state nung tensa tamajung ka marudang asenoki mera agütsüla, ta parnoki ashi.

Naga nunger tarutsü nung kumzüka alitsü mechi, NIPF aser DNSU ajangasa CSOs, NGOs, arogo, nübur lenirtem, yimten yimsüsür, sorkar ketdangsür, linük tenzüker aser ochi angatetba nüburtem dang DNSU-i nokdaka aliba tongpang nung tashi agi bhukuma nokdaksü ayongzüka liasü.

Kasa mapang NIPF ajangasa Murgi Pati nung non-locals temi lisopur ka merenshiba khukua aija liasü.

Tarutsü nung lokti meinprongtsüsa mataloktsü mechi aibelener nem tapet temerenshi agütsütsüla, ta parnokisa ashi.

## Manipur: BJP-i sorkar kumtettsü imlar, Congress-i election aginer

**Imphal, Aami/June 29 (Agencies):** President's Rule kübok aliba Manipur nung tang tashi yimtenren tsütsü nükla tejangja ka makai alidang Bharatiya Janata Party (BJP) ajanga state nung 'popular government' tanaben amenoktsü teimla aliba lemsatapa liasü.

Ajisüaka Congress party-ibo tang yimtenren mangatettep adoka aliba aser Centre inyakyim nung taginüba balaka lir.

Taoba Manipur Chief Minister aser BJP Manipur Pradesh lenir N Biren Singh-i Honibarnü Imphal nung osangbener den jembidang, state nung sorkar tasen ka tentettsü asoshi Central sorkari yakta mera agütsü imlar, ta ashi.

Pai iba atema mapang tejangja masü saka centre nung lenirtemi tensa asadanger aser tarutsü mera magidang asangsang tensa asadangtsü, ta ashi.

Manipur Legislative Assembly ya February 13, 2025 nungi 'suspended animation' kübok lir

aser iba kümsük ya 2027 tashi lir.

Congress lenir aser Sugnu MLA Kangujam Ranjit-i tang tensa yagi tangsa tangbo sorkar tasen ka tentettsü majiteter, ta shir anogo ka lir Biren Singh-i iba sangdong ya agütsü.

Hokulbarnü par constituency nung sentong ka nung jembidang, arütsü aliba state nung mepetmesü ya mapang talangka alitsü amai ajiteter aser central ketdangsüri meshidak amshir, ta Ranjit-i ashi.

BJP-i Manipur nung "proxy war" asayar ta pai tai tongloksü aser tang tensa ya Central BJP indang political interests ajanga lir, ta ashi.

"Iba mepetmesü kodang atemtsüar shingaia meshitettsü. Central BJP ali tashi, BJP-i aniba sorkar tasen ka kumtettsü takoktsü," ta Ranjit-i ashi.

Congress-i maneni Manipur nung Assembly elections tasen agütsü akhanger aser mandate tasen ka ajanga dang state nung yimten tashi aittsü ta ashir.

## Assam nung October tashinung emergency landing facility renemtsü: CM



**Guwahati, Aami/June 29 (Agencies):** North East nung mezüngbuba national highway nung emergency landing facility ya Assam anüdoklen October tashinung atemtsü imlar, koba ajanga national security aser disaster preparedness nung tashi itshitsü, ta Assam Chief Minister Himanta Biswa Sarma-i Deobarnü ashi.

Iba ama national highways nung strips ana western aser central Assam nunga yanglutsü aser itemji Sukhoi aser Rafael ama advanced defence aircraft aser civilian flights tem anentsü atema amshitsü, ta pai ashi.

Indian Air Force den teka amteper Dibrugarh-Moran NH project kübok Morang Bypass nung iba facility yanglutsü aliba tesem pai semdangba mapang, "North East region ajunga nung emergency landing facility ibai mezüngbuba alitsü," ta ashi.

Ibai Moran aser Demow tsüngta kilometre pezü national highway nung yangluba strip ka lir aser October tashinung activate asütsü imlar, ta pai ashi.

"Ni district administration, NHIDCL aser IAF den tanü yangi senden menogo aser maparen tilateri kar bentettsü lir," ta Sarma-i ashi.

Iba strip nung civilian aircraft nungi tenzüka Sukhoi aser Rafael ama advanced fighter jets tem anentettsü, ta pai ashi.

"Iba strip lapokba mapang IAF dang air show alitsü aser fighter jets kar bener arutsü ni asüngdangogo," ta Sarma-i ashi.

Centre-i iba ama emergency landing facilities ana ano state nung yanglutsü - ka Tihu aser Barama tsüngta aser ka Nagaon aser Lumding tsüngta.

Chief Minister's Office ajanga X post ka nung, "NHIDCL-i iba tongtipang

project mapa kuma inyakba ajanga disaster response aser national security renemshiba nung tashi itshitsü," ta ashi.

Ano tzümetsüng mapang amshitsü atema eastern mesüra upper Assam nung national highways nung tazüng aliba tesem kar nung helipads yanglutsü indanga NHIDCL den jembigo, ta Sarma-i ashi.

"Tang aliba facility nung tzümetsüng kanga aliba mechi helicopters manentetba lira, item atema onoki national highway tesem kar nung helipads yanglutsü bilemer, koba tzümetsüng agi mokongshidak alitsü," ta pai ashi.

"Onoki Central sorkar den jembiba mapang lir. Numaligarh nungi Dibrugarh nungi Tinsukia tashi stretch ajunga nung sentong lir, koba ajanga lenmang ajunga tajungba akumtsü," ta Assam CM-isa ashi.

## Tuensang nung sorkar mapa inyaker mapai moi itasen angur

**Dimapur, Aami/June 29 (TYO):** Chang Wedoshi Setshang (Chang Students' Conference) ajanga Tuensang district nung sorkar offices balala sema jajaba mapang ketdangsüba nung tapok aliba aser mapai maruba aika putet.

June 24 & 25 anogotem CSC ajanga district kübok sorkar office ajunga awajema semdangba mapang, talisa Grade III aser Grade IV employees temi mapa senzüka yutsüba ngutet aliasü.

CSC sangdong ka ajanga ashiba agi, staff aika kuli tejangja makai mapang talanglang mapai maruba liasü. Nisung kari parnok mapai marutetba indang kuli agütsü, saka aika kuli tajung meliasü.

Ano tali taoksatsüka ngutetbaji, Heads of Departments (HoDs) aika mapang talanglang mapai maruba ya liasü, aser iba yongji mapa inyakba yimya nung tamakok aludaktsür, ta CSC ajanga ashi.

Office kar nungbo employees temi temelaba makai sodi agir

meyipa shilangba sülen attendance registers nung meyongnem ashikülaka agütsüba liasü ta ashir.

"Employees aikati iba tensa nung maongka agia temelaba makai sodi agir parnok mapai meyipa shilangba sülen parnok indang meyongnem ashikülaka agütsüba lir," ta sangdong ajanga ashi.

Lenir tejangja maliba yong, Accounts Sections nungi staff tem bill processing atema nüngdakba temelaba agütsü asoshi Kohima aser Dimapur bushia aotsüsa akumer, ta kaketshir temi ashi.

Tebilemstü tulutibaji, Tuensang nung sorkar mapa inyaker aika mapai moaka mesüra nungloksüba mapa meinyakaka mapang shidak nung itasen agizükba ya lir.

Ibai mapa senzüka yutsüba, nübur sen meshidaki amshiba aser nübur tenzüker dak nungi imlaba yimya nung kanga aibelenba lir, ta CSC ajanga ashi.

Chang Students' Conference-i iba tebilemstü asoshi süoki ia

agizüka tekeraba nung mapa shidak inyaksü ayongzüik.

Parnoki office balala semdanga jajaba sülen sangdong ka agütsüba nung, nübur tenzüker ajunga asoshi teti mapai aoba, yimya aser mapang shidak amshiba nung atsüanem akatsü mali, ta kaketshir temi ashir.

Mezüngbuba mera ama, CSC ajanga absentee employees aika dang anogo tenet tsüngta pei inyakba tesemi arutsü yimjak nung totuyuba agütsüogo. Aser tashi mangartem nem CSC indang pangzüng No. 27 nung aliba ama tapet mera agütsü ta ashi.

Iba den külemi Tuensang district nung department aser sorkar institutions ajunga dang ita shia indang attendance register anepalutsü, aser pei HoD ajanga jangjar meyongnem agütsütsü metetdaksü. Office mapang shidak amshitsü ashi.

Chang Students' Conference ajanga nüburtem dang nübur tenzükbaba mapa nung metokmeperi kar danga lira par office nem indang-indanga osang agütsütsü ayongzüik.



## Ukiam nung Kulsi dam project anema senden ayongzüka amen



**Guwahati, Aami/June 29 (TYO):** Assam-Meghalaya arrtsü nung alirtemi, Kulsi ayong nung hydroelectric dam yanglutsü atema benoker aliba tali anem tenzüko. Iba inyakyim ya Assam Chief Minister Himanta Biswa Sarma aser Meghalaya Chief Minister Conrad Sangma napronglai pusema arudar.

Assam aser Meghalaya Joint Resistance Committee-i, taruba jenjang agitsü atema sensak asemstü asoshi Hokolbarnü Ukiam nung representative senden ka ayongzüka menogo.

Social activist Rajani Boro lenisüba nung iba senden amen, kong committee züngsemtemi iba tzüng nokdang dak sendakba nung tzümpung aser nüburtem libaliro aser rongsenketzüng dak kongshiba tebilemtsü lemsatapa liasü.

Assam unit indang secretary Maniram Rabha-i, iba seden ayongzüka amenba nükjiong metetdakja liasü. Pai, local loktitem anidentsü aser parnok nem osang agütsütsü asoshi longkak aitba sentongtem takaratiba nung ayongzüka agitsü nüngdakba lemsatapa liasü.

"Kulsi dam yagi asen lobaliro

aser tzümpung dak kongshitsü. Asenoki longjemer nüburtem nem tangazükba agütsütsü nüngdaker," ta pai ashi.

Senden nungsa Nandalal Rabha-i longjemer tashi taitba nokdaksü ayongzüka liasü. "Temulungtetba tulu aliba aser longjemer aliba lokti tentet kati dang iba project asadangshitsü atema sorkar nongshitetsü. Asenoki iba anema nokdaksü atema political party tem dak masü tekübokba jenjang nung aliba lokti tentettem dak metaloktsüla," ta pai ashi.

Meghalaya unit tir Albert Nonglai-i, Chief Minister Conrad Sangma nem tezüluba nung takhangba ka agütsütsü atema committee-i telemtetba agiba metetdaksü.

Iba shiti ajanga iba project agintsü atema sorkar dang mepeshitsü aser iba ajanga tzümpung aser rongsenketzüng aser libaliro dak kongshitsü aliba indang metetdaksütsü, kong nüburtem pei talidak toktsür aotsüsa akümtsü aliba aser arem shiruru aser süngtonglitong samatsü aliba indang metetdaksütsüba densema lir.

Kasa mapang nung mendenbula Rajani Boro-i, iba tzünokdang ajanga iba tesem

nung aliba nüburtem libaliro dak kongshitsü ana nung aliba indang lemsatap. Lai, iba tesem nung aliba aluyimer, angopur aser shishilembartem lendong nung aliba indang metetdaksü.

Boro-isa, 1897 küm menoknok ajanga kümtetba Chandubi awatsüng indang jembia iba tesem ya menoknok anokba tesem ka lir anungji iba amala infrastructure project tulu ka yanglutsüji asadangtsüla ta ashi.

Senden nung Kaifa Rabha, Biswajit Rabha, Jagdish Rabha, Grateful Sonhom, Kumar Marak, aser Thiodas Marak nungeria shilem agia liasü.

Coimmittee-isa, tekübokba jenjang nung sentongtem ayongzüka longkak aiba sentong tali takangba benoktsü bangjema liasü.

Lokti senden aika ayongzüka amenba den awareness sentong balala agiaka Chhaygaon MLA Rekibuddin Ahmed, RHAC Executive Member Tonkeswar Rabha, aser Meghalaya Chief Minister Conrad Sangma amala nüburtemi shimba lenirtemi iba tesem mesemdangba mesüra lokti den indang indang tongtepratep masüba atema tezü adangba iba tesem nung alirtemi lemsatapa liasü.

## DDCF consultative senden ka menogo

**Dimapur, Aami/June 29 (TYO):** June 28 nü Lotha Hoho Ki, Dimapur nung Dimapur District Citizens' Forum (DDCF) consultative senden ka menogo.

Iba senden nung Interim ketdangpurtem, sanen luden züngsemtem, DDCF nung züngoksema aliba lokti tentet balala tir/mendenpurtem aser advisor temi shilem agia liasü.

Senden nung lokti tentet

ajaki, kin aser lokti tentet mebendangi Dimapur nung chichia amenoker alirtem temeden kümzüka ayutsü atema iba Forum tashi itshitsü sensaksema liasü.

Züngsemtemisa Dimapur District nung ILP benokba ya nüburtem den peta asütsüla ta bilemba lemsatapogo, kechiyong Dimapur district nung tazüng tashir, mazüng mashir aser lokti balala amenoka lir.

## Manipur Police-i gari auyar ka apu



**Imphal, Aami/June 29 (Agencies):** Manipur Police Commandos indang Anti-Vehicle Lifting Unit-i Honibarnü Thoubal district nungi gari auyar ka pua pa ket nungi auyar aliba two-wheeler ana ngutetogo, ta police-i Deobranü metetdaksü.

Source balala nungi osang angazükba sülen bushisüngdanga aoba mapang team yagi parking lot ka nungi Honda Activa ka auyar oa Thoubal district nung miima aliba indang osang angazüka liasü. Iba dak ajemdaker police-i tesem ka meita ao.

Thoubal district nung Lilong Chaobok tesem meita aoba sentong ya ghonda ana shi agi, aser kanga takok ngua auer ya apuba den pai auyar aoba gari dena ngutetogo.

Aija alisang ya Syed Riyaj Khan (28) ta jangjaogo aser pa

Thoubal district kübok Lilong Chaobok tesem nung alir.

Osang ajanga ashiba agi, police-i registration number maliba blue Honda Activa ka, anti-lock jack aser Aadhaar card ka nguteta liasü. Aija alisang aser pa ket nungi ngutetba gari aser osettem ya ken o dak sendaka aliba police station nem bendanga agütsüogo.

Anogo asem tsüngda tang agi tanabenbuba gari auyar aobatem ngutetogo.

June 26 nü nüburtemi teyari agüja police-i Thoubal district kübok Sangaiyumpham Puleipokpi tesem nungi gari auyar Aribam Momo pua liasü. Pa ya Babu Bazar nung gari ka auya aliba mapang pua liasü.

Police temi Honda Activa ka aser tashishitsü aketba oset aika pa ket nungi nguteta liasü.

## Meitei nunger lokti tentettemi MHA ajurutsü

**Imphal, Aami/June 29 (Agencies):** Manipur nung Meitei nunger lokti tentet balala nungi lenirtemi Ministry of Home Affairs (MHA) den June 30 nü ajuruteptsü sentong yanglua lir.

Senden nung tang kin o kin tsüngda state nung mangatetep adoker aliba dak rangloker sensak asemstü.

All Manipur United Clubs Organisation (AMUCO), Coordinating Committee on Manipur Integrity (COCOMI), aser Federation of Civil Society Organisations (FOCS) nungi lenirtemi sensaksem nung shilem agitsü.

COCOMI convenor Khuraijam Athouba-i osangbenertem den sensaksemba mapang ashiba agi, lenirtemi nüburtem tezü adangba aser tebilemtsütem indang MHA ketdangsürtem nem metetdaksütsü.

Kasa mapang nung AMUCO züngsem tejen S

Bhubon-i ashiba agi, iba senden amenba nükjiong tongtibangtibaji Manipur litsü memelenshidaksütsü atema lir.

Lenirtemisa, Imphal valley nung aliba aluyimertem amokmeren balala nungi kümzüka toktsütsü atema tangsa tang jenjang agitsübatem aser mapang talangka agia jenjang agitsübatem indang lemsateptsü. Tanga tongtibang onüktem rongnung highway tem lapoktsütsü aser state nung pei talidak ki toktsür jenshia or alirtem ken o benoka sensak asemstüba densema lir.

Meitei aser Kuki nunger mangatetep adokba ajanga Manipur ya 2023 küm May ita nungi mepetmesü tulu nung arudar, aser tang tashi nung nisung 260 süogo aser nisung meyrejang aika pei talidak ki toktsür jenshiaogo.

Tensa mejungi akümba sülen Centre sorkari Manipur nung February 13 nü President's Rule benoker arudar.

## Indian Army aser AR nati Captain Neikezhakuo Memorial Day ayongzüka amung



**Dimapur, Aami/June 29 (TYO):** Indian Army aser Assam Rifles nati ayongzüka 26buba Captain Neikezhakuo Kengurüse Memorial Day mungogo. Kengurüse ya Maha Vir Chakra (Posthumous) anguba sepai ka liasü, shibai 1999 küm Kargil War nung Operation Vijay mapang pa taküm bendanga agüja liasü. Iba anogo nüngdem nung Kengurüse War Memorial, Nerhe Phezha, Nagaland nung sentong ka ayongzüka agiogo.

Sentong nung Major General Manish Kumar, SM, Inspector General Assam Rifles (North) tongti tejaoker liasü. Sentong nungsa Kengurüse'er tsürapur Mr. & Mrs. Neiselie Kengurüse, Wokha aser

Kohima nungi veteran aser servicemen tem, Indian Army aser Assam Rifles nungi sepaitem, local ketdangsürtem, Don Bosco School (Chiephebozou), Fernbrook School (Wokha), G. Rio Higher Secondary School (Kohima), aser Assam Rifles Public School (Chieswema) nungi kaketshirtemi shilem agia liasü.

Sentong ya tongti tejaoker-i leper nung naro tokja tenzük aser iba sülen Amar Jawan Jyoti tsükloka liasü. Iba sülen Capt Kengurüse, MVC (P) indang taküm otsü documentary film ka sayua liasü.

Maneni pa nem tetushi agüja sarasadem mapa ka agi aser iba sülen 1 Nagaland NCC Battalion, Fernbrook School

Pipe Band, veteran tem aser Assam Rifles Pipe Band nungeri march past süa liasü. Sentong nungsa Mr. & Mrs. Kengurüse nem mejeta tetushi agüja liasü.

O jembiba mapang Maj Gen Manish Kumar-i, Capt Kengurüse tasü aitba, pai pa taküm bendanga agütsüba indang lemastep aser ashiba agi, pa indang otsü yagi India nunger taruba putu maneni ajungmesotsü.

Maneni Mr. Neiselie Kengurüse-i "Capt N Kengurüse, MVC Medical Camp" tenzüktsü, koba Assam Rifles indang civil outreach inyakyim ka liasü. Sentong nungsa Neingutoulie Kenguruse teti-i züluba pa indang biography ka sayua liasü.



Odisha kübok Puri nung tekülem ki anasa nisung asem ajemset



June 29, 2025 anepdang Puri nung Rath Yatra benjung mapang lokti tulu nungtepdang nisung asem ajemsetba sülen hospital ka kima mangyimer kar noksa nung angur.

**New Delhi, June 29 (Agencies):** Amongnü anepdang Rath Yatra benjung mapang Odisha kübok Puri yimti nung aliba Gundicha tekülem ki anasa lokti tulu nungtepdang nisung asem ajemset aser nisung 50 dak tali yiruo.

Anepdang 4:00 nungi 5:00 ako tsüngda Hindu nunger tamangertem meyirjang aika adenshia aliba mapang nung truck gari ana telungi aitba ajanga lokti nungtep tenzüka liasü.

Iba osang angashiba sülen chief minister, Mohan Charan Majhi-i mangyim jashi lemsatepba den külemi asürtem kibong shia nem sen lakh 25 agütsütsü sangdong.

CM-isa Puri DCP, Bishnu Charan Pati aser Police Commandant Ajay Padhi na mapa nungi anentsüba den külemi ketdangsertem dang District Collector Siddharth S Swain aser SP Binit Agarwal na transfer yoktsü tetuyuba agütsü.

Iba lendong nung asürtemji arrshi küm 80 Premakant Mohanty, Basanti Sahoo (36) aser Prabhati Das (42) nunger lir ta jangjaogo.

Iba tatalokba kuli jangjatsü atema state sorkari bushisüngdang tenzüko. Chief minister-i, "Iba lendong ataloktsüsa aibelenertem nem temerenshi agütsütsü. Security tashimait jangjatsü atema bushisüngdangtsü. Pei mapa nung tamakok angurtem nem temerenshi agüjang ta ni tuyuogo," ta metetdaksü.

Tenük kuli alir kati, "Yasüng 11:00 ako tashi ni tekülem ki anasa liasü, ajisüaka lokti ketdangsübarenji jangramatem liasü. Kanga tongtibang nisungtem atema lenmang tasen ka yanglutsü aser lokti meyipa aotsü atema kanga tezülen lenmang lapoktsü. Ibayongji nisung aikati kikümbanglen nungi meyipa aoba ajanga nisung tali aküm," ta ashi.

Paisa, "Aonung ketdangsertem mesüra police maliasü. Iba lendong atalokba ya Odisha administration tashimaitba ajanga lir," ta metetdaksü.

Osangbenertem den jembidang Odisha Law Minister, Prithviraj Harichandan-i, "Tangu

mesashiteti nisung asem asü aser nisung tenet kanga mejungi yirua lir. Iba ya tia maka tatalokba ka lir. Tanep ni Chief Minister den jembiogo. Onoki aibelenertem nem temerenshi tulu agütsütsü," ta metetdaksü.

Iba tatalokba aija taoba mapang Odisha chief minister Naveen Patnaik-i, "Rath Yatra benjung mapang lokti mazüoktetba agi nisung noklang aika yiruba sülen anogo ka dang lir tanü iba lendong ya ataloker. Iba ya ajanga sorkar tashimait kuli sayur," ta ashi.

Tenük kuli alirtemi ashiba agi, külemküja nung amshiba osettem abenba truck ana lokti aliba telung jagi aitba ajanga iba lendong atalok.

"Lokti tulu den külemi police peria maliba agi iba lendong atalok," ta nisung kati ashi.

Honibarnü-a Rath Yatra nung lokti tulu nungtepba ajanga nisung 700 dak tali yirua liasü aser iba nungjagi nisung 230 Infectious Disease Hospital-i anir ao aser nisung 520 shi district headquarters hospital-i anir oa liasü. Nisung 12 bo ICU nung mongdar.

Hyderabad nung sen crore 3.5 jenjang auyaba phone 1,130 ngutetogo

**Hyderabad, June 29 (Agencies):** Hyderabad yimti nung mobile phone auertem nokdangtsü atema Rachakonda Police Commissionerate nungi police-i meranga inyakba ajanga tesüiba ita ana tsüngda auyaba phone 1,130 ngutetogo.

Police-i ngutetba phone ji sen crore 3.5 shi jenjang lir.

Rachakonda Commissioner of Police, Sudheer Babu-i, taküm küm tenzüker tang tashi nung police-i samaba mesüra auyaba phone 3,694 ngutetogo, ta metetdaksü.

Sentong ka ayongzüka item phone ji kiburtem nem meyipa agütsüogo, ta pai ashi.

Kiburtem nem phone meyipa agütsüba dak alia

police-isa nüburtem dang auyaba phone malizüksüla, ta tekümdangtsü metetdaksü.

Police-i yimti nung aliba sensotem dang, phone alidang anguba bill mesüra documents shidak makaibo shinga dang nungi second-hand mobile phone malizüksüla, mesüra temerenshi agütsütsü, ta tekümdangtsü metetdaksü.



June 29, 2025 nü Patna nung Waqf (Amendment) Act, 2025 anema ayongzüka 'Waqf Bachao Samvidhan Bachao' sentong nung Congress lenir, Pappu Yadav-i jembidang tangokba noksa nung angur.

Waziristan nung nisung 13poksetba atema India nem tai tongloktsü

**New Delhi, Aami/June 29 (Agencies):** Pakistan nung Khyber Pakhtunkhwa province kübok Waziristan nung nisung kati taküm bendanga agüja bomb amshia amakba atema Pakistan-i India nem tai tongloktsüogo.

Honibarnü Pakistan nung nisung kati taküm bendanga agüja gari ka nung bomb amena bener sepaitem convoy ka nung oa tsükokja amakba lendong nung sepai 13 pokseta asü aser 20 yirua liasü.

Iba tatalokba atema Tehreek-e-Taliban Pakistan (TTP) indang Hafiz Gul Bahadur teloki tenüng agiogo,

ajisüaka Pakistan-i maneni India nem tai tongloktsür.

India Ministry of External Affairs-i sangdong ka ajanga, "June 28 nü Waziristan amakba atema Pakistan Army-i official sangdong ka ajanga India nem tai tongloktsüogo. Onoki iba sangdongji magizüker aser sashia aitsür," ta metetdaksü.

Iba tatalokba sülen Pakistan Ato kilonser, Shehbaz Sharif-i, 'iba ta tasümail mapa' ta aitsü.

India amokmerenba olen ka nung Pakistan Army tongti, Field Marshal Asim Munir-i, Pakistan tashi meitdaksütsü merangra onoki ibaji anema sashia inyaksü, ta metetdaksü.

Ita pongu tsüngda BJP-i Delhi ashiocksüogo: Arvind Kejriwal



**New Delhi, June 29 (Agencies):** Taoba mapang Delhi Chief Minister aser AAP tongti lenir, Arvind Kejriwal-i, Delhi nung BJP sorkari par medemer takartem tajangzük ngudaktsütsü atema kanga sensakertem aliba tesem 'slum' nung kiojen bendoktsür, ta aitsü.

Iba ama kiojen maneni bendoktsüra BJP sorkar kümsük abensaa malitsü, ta pai ashi. Jantar Mantar nung longkak aitba sentong nung jembidang Kejriwal-i, "Küm 25 sülen Delhi nung sorkar akümba BJP-i "Jahan Jhuggi Wahan Makan" tenangzüka ashiocksüogo aser sorkar akümba sülen ita trok tsüngda sensakertem aliba kiojen bendoktsür," ta ashi.

Paisa, Ato kilonser Narendra Modi-i taila tenangzükbatem agütsür, ta ashi.

"Delhi nung iba sorkar tentetba sülen ita pongu dang, ajisüaka parnok anema longkak aittsü atema nisungtem Jantar Mantar nung adenshitsüsa akümer. Assembly elections matongdang ni nenok dang parnok nem vote tagütsü ta shiogo, kechiyong nenok kiojen nung parnoki tenük yoker. Parnoki Delhi raksatsür. Tang kanga tatsük mapang nung parnoki nenok talidak ki makai kümdaktsüogo," ta Kejriwal-i ashi.

Ato kilonser Modi ya tiyazü jembir ka ta shia Kejriwal-i, "Ato kilonser Modi tenangzükbatemji taila. Pai 'Jahan Jhuggi Wahan Makan' nangzüka liasü. Parnoki nenok li azüngtettsüba sülen par medemer ket nung agütsüner," ta ashi.

Chief Minister Rekha Gupta-i aniba Delhi sorkar dang pai, "Nenoki maneni kiojen bendoktsüra ner sorkar küm

pongu abensaa malitsü. Küm asem tsüngda sorkar oadoktsü. Anna Andolan mapang nung iba Jantar Mantar nungi Congress sorkar laodakja liasü. Nüngdakra onoki ano 'andolan' ka tenzüksü," ta ashi.

BJP sorkari Delhi nung angati electricity scheme agentsü tebilemba lir, ta shia Kejriwal-i, "Ni jembibaji shidak ataloker. Parnoki nenok kiojen bulldozer agi bendoktsütsü ta ni jembia liasü, aser tang ibaji ataloker. Tang ni ya ashir- küm ka tsüngda parnoki angati electricity scheme agienadoktsü," ta metetdaksü.

BJP aser Congress naprongla aija pai, "BJP aser Congress nati longjemer Delhi election nung toktepa liasü. Parnok ya adianu lir. Party anaprongla ya takar pusemertem aser sensaker anemertem lir. Nüburtem atema inyaksü melen parnoki FIR-FIR saisapong asayar - Manish Sisodia, Saurabh Bharadwaj aser Satyendar Jain nunger anema ken o benoker. FIR asayamenü atema Delhi-i vote agütsü masü," ta ashi.

BJP tenangzükbatem nung tamang makatsüla, ta shia pai, "Modi ki Guarantee nung kodanga mamangtsüla. Taila oset ka ama pa tenangzükbatemji taila," ta ashi.

Ano külen Kejriwal aija Delhi BJP Tir Virendra Sachdeva-i, "Iba nisungba yagi coronavirus wara mapang nung 'slum' nung alir sensakertem kümzüksü melen taridok ang aridoka liasü. Tanübo pai parnok atema taila nüktzü ayimer," ta ashi.

Sachdeva-isa, Kejriwal-i pa atema tamarener ki süa liasü saka sensakertem nem Narela aser Bawana nung terenemjem ki magütsütet, ta aitsü.





## TIR YIMYIM YIMOBILEM (EDITORIAL)

DIMAPUR MONDAY, JUNE (AAMI) 30, 2025

### Tsümar meramatsü tenzüker !

**A**nogo ishika jakdang Dimapur nung aonsutsü ayokdak tesem ka nung aonsutsü ayoker tsümar chanu kati lisopur ka dak teka aiba mapaji bendangeri lisopur meramatsüba mapa ka lir. Ibajibo shishilembadak mesüra kima yimdong nung nisung ana tsüngda mangatettep adoka raratepba mapa ka masü, saka bendangeri asen lima amaksü tenzüka mapa ka asütsü. Yashi tashi asenok lisopur kechasütsüa masüba nisung danga sang, tsümartemi sahib, mimsahib ta jaa aru aser asenok dak teka sangshitsüabajibo yutsür o tetsürok agia mejembi saka o tanep agi dang jembia parnok tayoker aser asenok talir ta putep-putepa lia aruogo. Ajisüaka, joko asenoki parnok dang nungi alia alia parnok takarba takarba aküm aser asenok sensakba-sensakba kümado, anungji tangbo parnoki sahib aser memsahib nungertem to parnok dang nungi tilaba, memetetba aser teküpbokba jenjang nung angur aser meramatsütsü tenzüker. Ibai asenok asoshi arrsangoktsüba mapa ka asütsü. Tanübo teka dang sangshir, saka yangji asenok tan mesüra asüngbo asenok asen lima nungi bendangertemi aridoktsüa mapanga arutsü. Naga nunger ajak asoshi rongsen moludak aser shishilembadak tesemji Dimapur ya dang lir. Tayimtsüa aser train-a Dimapur tashi dang tongteter, anungji Nagaland nung dang masü saka Northeast nung bendangertem melamelaa aruagi ayangdak aser shishilembadak tesem tajungji Dimapur yimti ya ka kümogo. Atangji, Naga yimten tebilemtsü aliba agi aiben mapang tamajunga ajurua, bendangertem dang masü saka lisopurtema Dimapur nung mulung anisüngzüka melitetsüsa akümba otsü lir. Idangji, Dimapur nung Nagaland senso kuma alir tsümartem agi pei meyong kiojena yoktoker ogo. Ajisüaka, Dimapur toktsür aoer dang nungibo bushia arua alir teimba kuma, tanübo Dimapur yimdong nung tsümar ter ajurudang, Naga nungerbo asempezüka dang ajurutsü. Iba amaji Naga nunger yimten yimsüsür, tulur aser takar meyong rongsen ajak tsümartem ket nung lir. Aji oda, asenok Delhi aotsü nüngdak adok danga tsümar kati ticket alitsütsü aser oagi Delhi nunga tsümar kati asen nüngdak jembitsütsü aser meyipa arudang Kolkata nung tsümar kati anepalur yoktsü ta asenok Naga nungertem Dimapur nung aonsutsü aser angok ayok dak nungi tenzüker Delhi aser Kolkata tashi nung tsümar teyari medeni asenoki süngo marok kata yanglua mejemtet kümogo. Iba jagi tali parnoki asenok mezüngmeshir. Aji oda, asen lima nung asen mapa inyaksür ajak Miya nunger aser aonsutsü nungi shir kiojen yangluba osettsüset ayoker ajak kar Marwari aser kar Bihari nunger ta akümba ya asenoki reprangteter asü mereprangteter ? Item nemji asenok ita sen anguba ajak agütsür. Ashiko, item dangji Naga nunger telok teloki saru meshia alitsüa akok, saka iba jagi parnok masü asenok akoksar, kechiyong parnoki item saruji temloker asenok dang ayoker. Naga nunger külen nüsüng merenloker aser külen rongsen nunga tesensakba akümer, anungji tanübo Naga nunger auso bendanger ket nung yua lir. Aji oda, Dimapur nung tesem aika nung lisopurtemi bendanger ki nüksüba angutsü aser liso pur lanurtem aika bendanger kübok kilir mapa inyakba ajangshitsü. Atangji, asen lima nung asen kija alitsü ta masü saka bendang ter-na nungi arua mapa tapu balala inyaka alitsüla, iba jagi dang asenok shisatsü nung aser rongsenren nunga renloktsü. Kasaji asenoka tanga lima nung oagi mapa tapu balala inyaka alitsü. Ajisüaka, tang amaji, asen lima nung asen dak bendangertemi meramatsüi teka aitsüsa asenok malitsüsa asenok meraketa alitsübaji senso ka teinyaktsü asütsü. Nisung ka mera aser akhümji angati masü, ibaji meranga inyakba nungi metetetba aser akaba nungi arutsü. Ibaji meteta kodang asenoki asenoksasa talir asüba nungi tayoker kümdir aser sentsütsür jenjang nungi taputsür kümdir, asenoki manganüyongi tsümartemi asenok dang akhi ama sahib aser mimsahiba ajatsü. Ashiko, akhidang ajaba sahib aser memsahib tobo tayila asütsüa akok, saka kodang asenok dak temetetba aser takaba tashi aliba agi tangari asenok meraketa reprangdir, idangji ajaba sahib aser memsahib-ji shiktakba tajala ajar asütsü.

## OLEMSABANG

### Ajongben timtem mapang teyaritsü-yim tetuyuba kar:

~ Dr. N.Meren Imchen, Lower Bayavu Hill

(Yashi adok nungi...)

8. **Temola tetsü telong kuma atudang(calf muscle cramps):-** Temang tali anibelemer temang nung tsü sepa adokdang iba timtem aiben ataloker. Iba mapang nung- 1)Mejangdaksür kelen tetsüng songladaktsütsü(stretched out), 2)temepuji temaleni(pointing toes upwards) nungketa yoker tatsüka atatsü, aser 3)iba den tetsüji(muscle) atsülangdakja tanemi massage asütsü akok.
9. **Ajongben tennalen tashitsü atuba(Stitch-sudden sharp pain in the side of the body):-** Iba ya diaphragm kangterenba(painful spasm of diaphragm) ajanga atokdaksür- Nisungbaji tanemi ontakdaksür terongtong nung tanemi aeishitsüla(rub gently at the back) aser tsü talem jemdaktsütsüla.
10. **Per mechidang(Snake bite):-** 1)zübupangji sapon agi minute 4/5 tashi shitoktsüla 2)ring mesura suoshi tight ajak agizükatoktsüla(temang mawakdang), 3)Marakzüdaktsütsüla aser yakta hospital bushitsüla. Tekümdangtsü kar: zübupang tekalen lisu agi malentsüla, kotari-i rangpoka azü endoktsü memerangtsüla aser tangoba anendaktsütsü atema mozü machitsüla.
11. **Azü-i angodang(dog bite):-** 1)zübupangji sapon-i minute 4/5-shi shitoktsüla, 2)Azü yimra anentaktsütsü atema tashi agüja bandage agi aleptsüla aser hospital bushitsüla. Shiruruji shiranger asü masü metettsü atema metepseti sentaka ayutsüla.
12. **Menung dang(Hiccups):-** 1) tangu mesashi-i tatsü ka arema soettsüla(hold your breath), 2)tsü temokong Ishika meilongi ajemtsü akok, 3)Ice tsü agi tebang shitoktsü akok(gargle) 4)Temeli tanemi atsüzüktsü akok aser 5)chini spoon ka shi meilongi achitsü akok.
13. **Ajongben saksünetsü atudang(sudden feeling of vomiting):-** Iba ama mapang nung ne tebinpang tiyong portion teret lanu teküpoklenji ne temeyongi force agüja pressure agütsü nung ken atemabo anentsü akok(emergency mapang).
14. **Ajongben hachhinutsü atudang(sudden feeling of sneezing):-** Lokti nung chiyungdang mesura lokti nung jembidang mesura ibala mesukba situation nung hachhinutsü atudang- ne teni küpok tarok portion(depression) nungji temeyongi tashi agi second 4/ 5 shi marakzüi nemettsüla.
15. **Tepok aodang(loose motion):-** Kidang yanglutetba mozü (rehydration solution)- tsü 1 litre + Chini 8 table spoon + Metsü(salt) 1table spoon meyoktepa yanglur yua atar, tepok kwiben odir paibenji jemdaktsütsüla.
16. **Togyimra/Nashira(epileptic fits):-** Tebang nungi puja adoka ondaker ateptendang- 1) Tashi amshia azüoktsü memerangtsüla, 2)Temeliji kümzüktsü atema spoon ka tepu(teeth) tetsüngda jagi yoktsüla, 3)temeket nung oset kar lira agienadoktsüla, 4) pujaji aidoktsütsü aser 5)suoshi tight lira lapoktsütsü, aser hospital bushitsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



Impur nung ABAM YM-i 'Lead Like Jesus' sentong ayongzüka agi



**Impur, Aami/June 29 (TYO):** ABAM Youth Mission ajanga maneni Yisu Mesüka Leniba (Lead Like Jesus encounter) Zone 1 nung aliba lanur lenirtem asoshi June 27 anogo nungi June 29, 2025 tashi Impur nung takok ngua agiogo, ta ABAM Executive Secretary, Rev. Temsü Jamir-i sangdong ka ajanga metetdaksü. Iba sentong nung Associate Pastor Youth temi anir Arogo pongu nungi lanur lenirtem 38 arua shilem agia aden. Iba sentong nung shisalen sayurtemji Toshi Sanglir, Secretary, ABAM YM, Teka Imchen, Coordinator, ABAM YM, Roseline, Coordinator, ABAM WM aser Limasangwa, Coordinator, Media & Social Concern, ABAM nunger liasü. Lanurtemi pei pei Arogo nung lenisüba shilem balala nung agia aodang aika asoshi temoatsü taküm südakjangma.

Sayutsüngir aser Lai tesayur, Cecil May alima nungi pilaogo



**Montgomery, Aami/June 29 (Agencies):** Faulkner University Bible college nung dean emeritus, Cecil May June 13 nü arrshi küm 93 ajungba sülen anogo ishika dang lirbo Amongnü (June 22) alima nungi pilaogo, ta par kibong züngsemtemi metetdaksü. Sayutsüngir, Bible professor aser Gospel Advocate aser Magnolia Messenger osangkakettem atema ocet zülutsür, Cecil May-i tawa 'honorary doctorate in Christian education' ngua liasü. Pa kinüngtsü, Winnie-a küm 9 tejaklen (2016) asü. Tena tanur pezü- Betty Lozada, Cecil May III, Roslyn Miller aser Richard May nunger sosema lir. Cecil May-i Tsüngrem aser Arogo kanga meimba den külemi pai ajuruba nisung ajak meima liasü. Khrista osangtajung sayutsüngitsü aser mission wadang atema

Cecil May-i north Mississippi nung aliba Arogotem nung sayutsüngia jaja aser 1967 küm New Testament biblical studies nung masters' degree ngua liasü. Pa mapang tatsüka Portland, Ore. nung Columbia Christian College nung tesayur inyak, iba sülen Raymond, Miss. nunga Arogo tasen ka tenzüksü. Iba sülen pai Vicksburg anasa "Five Golden Minutes" radio program ketdangsüa liasü. 1977 küm pa Florence, Alabama nung aliba Heritage Christian University nung Bible dean inyak; iba mapang nungjibo iba University nungjaji International Bible College liasü. Küm asem lir pa Kosciusko, Miss. nung aliba Magnolia Bible College nung Tir inyak. Pa küm 20 jungnüa iba College nungji Tir inyaka liasü. Iba mapang nungji pai tanak nisung sayutsüngirtem nem training agütsü, aser ibaji ajanga Churches of Christ nungi sayutsüngir tajung aika adokogo. Maneni 1998 küm nungi 2015 küm tashi pa Faulkner University nung dean inyak. Pa mapa nungi anisüngzükbä sülen-a pai maneni sayutsüngi, tesayur mapa inyak aser Gospel Advocate atema ocettem zülüja liasü. Paisa Magnolia Messenger aser "Preacher Talk" osangkakettem atema-a ocet zülüja aruogo. Cecil May tasü mangji Fulton, Miss. nung aliba Pine Grove Church of Christ nung pa kinüngtsü rema aliba leper anasa arem.

ANOGO ABEN TSÜNGREM DEN

Ateta Atsüngba Tsüngrem O


*Kechiaser Tsüngrem O taküm aser teinyak aser anatsü nok ajak dang nungi techiraba; aser taküm o tenüngla ya ajak ateta tsünga bendangtet aser temulung tebilemba aser tasa asaba yakta metetba. Ibri 4:12.*

Tsüngrem Oi na mesüngzüktetti kümdaktsür asü? Kodang nai Laishiba azünger, nai azüngba Lai tekong jagi na mesüngjemi kümdaktsür asü ? Kodang nai sermon angadir, Lai jagi ne den jembir ama nai bilemer asü? Nai Tsüngrem Oji taküm aser nai bilemba ajak bendanger ta nai metetta arur.

Kodang Tsüngrem Oi ne den jembir ibai teti nükjitong ka asoshi jembir. Tsüngremi ne mulung aser na Khrista den akanga sendaka alitsü asoshi na kechi nüngdaker agi metet. Nai temenen indang jembiba tebilemtsü kar lira, ne dangi aruba Oji temeli ajanga arur. Nai tatok agütsütsü merangya lira Tsüngremer jenjang nung tatok agütsütsü o jagi sayutsü. Asükümü ne taküm nung kamdong takang ka lir. Tsüngrem ne den ajemtsü atema jembitsü. Kechi temenen indangsa jembidir jembiang, iba mapa ajak na Tsüngrem ajanga nokdanger.

Ne tamang nung mesüngjemtetba paidoktsü lenmang kaji Tsüngremi ne den jembiba mangai toktsübaji lir. Nai Laishibaji mezüngi toktsütsü akok aser kong iba o sayur iba nung jagi pilaa alitsü akok. Shirnoki ibai soter ta nai metet, nai parnokji sentoktsü akok. Tajungtiba telangzübaji ken zülur sarasademji lir: "O Tsüngrem, kü dak bushiang, aser kü mulungjang metetangma: Ni tendangang, aser kü tebilemba metetangma" (T.Ken 139:23). Maneni Tsüngrem O jagi ne mulungjang shidokjang aser temenen kar ta lira bushitettang (Ef. 5:26). Teti ne taküm aser Tsüngrem O ajanga ne dang kechi ashir ana tsüngdaji sendaktepa ali bilemang. Tsüngrem O-i ne tebilemba aser ne mulungjang metetter ta metetta Tsüngrem O ajakji süoki ia agitsü yimya küma alitsü merangang.

Canada nung lungpak ka nung Kibubai sayuba sarasadem angu



**June 29, 2025:** Akhidang ajanga item maitsü/ojentemji Swedish ojangtem nung züluba akhidang Swedish oshi nung Kibubai sayuba sarasadem Kibubai sayuba sarasadem lir, lungpak ka Canada nung ngutetogo. Alima tesem ajaklen 2018 küm Wawa, Ontario Khristantemi sarasademba anasa maitsü/ojang 255 ajenloka 'Kibubai sayuba sarasadem' ji aliba lungpakji ngutetba sülen lungpak süklep three-by-four (3-4) lungpak ka nung zülua lir. Iba tesemji tekülem agiba mejangjai kanga süngmanga moapu ka mesük aser iba liasü, ajisüaka tawa lungpakji küm 200 shi tejaklen archaeologist Ryan Primrose-i nungi aliba asütsüa ako, ta den külemi research agiba parnoki metetdaksü.



Tir Yimvim

\* Tepoklang telonglen poktzütem lir.

Team yagisa, LMG magazine (INSAS) ka, .32 calibre injang ka, INSAS rifle injang empty cases 20 den LR-135 MTR ta ajener aliba tear smoke shells asem, Baofeng handset ka den charger, camouflage pant ka, raincoat ka, plate medeni bulletproof jacket ka aser camouflage cap ka nguteta liasi.



## Russia-i Ukraine dak drones aser missiles 500 dak tema khaloktsü

**Kyiv, Aami/June 29 (Agencies):** 2022 küm rara tenzükba Russia-i sülen anünglen nungi Ukraine dak tesashitiba maka drones 470 dak tema aser missiles tabu balala 60 khalokja Ukraine nunger F-16 pilot ka tepset.

Russia-i Ukraine dak aerial weapons 537 khaloktsü aser yanghi drones aser decoys 477 aser missiles 60 liasü, ta Ukraine indang air force ajanga ashi. Item rongnung 249 khazüka yok aser 226 sama, koba 'electronically jam' süa alitsü. F-16 fighter jet ka khazüka yok aser iba indang pilot asü.

Ukraine indang air force atema head of communications, Yuriy Ihnat-i Associated Press dang ashiba agi, yasüng amakba ya linük nung tanü tashinung tayimtsü amshia amakba rongnung tesashitiba alitsü. Kherson nung regional Governor Oleksandr Prokudin-i ashiba agi, drone agi amakdang nisung ka tepset. Kasa mapang Cherkasy nung tanur ka densema nisung trok yiru, ta regional Governor Ihor Taburets ajanga ashi.

Ukraine Tir Volodymyr

Zelenskyy-i social media X nung, "Ammang tepiyong ama Ukraine tesem ajungalen air raid alerts ola agüja liasü - asen anüng nung drones 477 liasü, timba Russian-Iranian Shaheds aser iba den missiles tabu balala 60 liasü. Russia-i takum aliba tesem ajak nung tenük yoker," ta ashi.

"Tia maka, parnoki amakba aridokdang aser F-16 pilot Maksym Ustymenko asü. Tanü pai aerial targets 7 samatsü. Par kibong aser külemi raraba adianutem den kü asükhu lemsateper. Pa asüba tensa tia ajak bushisüngdangtsü ni totuyuba agütsüogo. Ukrainian aviation ajanga tasü ita asen anüng kumzüka ayur. Ukraine kumzüka ayur ajak dang kanga pelar," ta pai ashi.

Zelenskyy-ia tanur ka yiru ta metetdaksü aser Russia-i amakba anendaktsütsü asoshi ajungshitsü international community dang ayongzük. "Tan hopta kisüng nunga missiles 114 dak tema, drones 1,270 dak tema aser glide bombs 1,100 jungnüa khaloktsü. Alimai yimjung asoshi ayongzükaka Putin-i

maneni raratsü akhi mapang telemtetba agia lir," ta pai ashi.

Russia Tir Vladimir Putin-i Istanbul nung indang-indanga yimjung ken o jembi tenzüksü Moscow renema lir ta ashiba sülen Honibar aonung amak.

Ajisüaka iba rara nung US-i anir linük balalai yimjung asoshi inyakba sülen anidakba mangur. Tawa Russia aser Ukraine delegations tsüngta Istanbul nung anaben ajurutepa jembishinü aka, saka tangatetep kati maru tembang.

Kyiv Independent osangkaket ajanga ashiba agi, southern Mykolaiv, southeastern Zaporizhia aser western Lviv densema linük tesem balala nung ola tulu adoka apokba aser amakba osang liasü.

Mykolaiv aser central Dnipropetrovsk region nung industrial facilities nung kongshi, ta ketdangsür temi ashir.

Russia nung Ministry of Defence ajanga ashiba agi, par sepaitemi arütsülen Kursk aser Rostov region aser Russia-i rakzüka aliba Crimean Peninsula nung Ukraine indang drones asem raksatsü.

## Iran-i ita ishika tsüngta uranium enrichment tenzükshitsü akok: IAEA chief

**New York, Aami/June 29 (Agencies):** United States aser Israel nati Iran indang nuclear infrastructure nung makaka parnoki ita ishika tsüngta uranium enrichment tanaben tenzükshitettsü, ta United Nations nuclear watchdog tekolak Rafael Grossi-i ashi.

US Tir Donald Trump-i tan ita amakba ajanga Iran indang nuclear mangdang küm aika tesüleni yokogo ta nenshia shir anogo ishika lir pai iba o ya Honibarnü ashi.

Honibarnü CBS News den jembidang, tongtipang facilities nung kongshiogo saka karbo tang tashi nokdaka lir, ta International Atomic Energy Agency (IAEA) indang director-general-i ashi.

"Parnoki ita ishika tsüngta centrifuges muzüka alutsü aser enriched uranium yanglu tenzüksü," ta Grossi-i ashi.

Iran-i weapons grade yanglutsü tera agi mejungi enriched uranium shilem 60 tashi bendena ayuba tebilemtsü pai lemsatep, aser ibaji tali tajungba kumra nuclear bombs toku dang timba yanglutettsü ta ashi.

Item stockpiles ya bomb pokloktsüdang belener liasü asü terabo raksatsüar IAEA-i memetet ta pai ashi. "Mapang

ka nunghosa jangjashiteptsüla," ta pai ashi.

Israel-i June 13 nungi tenzüka Iran indang nuclear aser military sites nung maka liasü.

Israel-ibo Iran-i nuclear nok-nü yangluba nungi nokdangtsü mechi amak ta ashir, saka Tehran-i yamaji meinyaker ta shijen ashir. Anogo ishika lir US aden aser Iran indang nuclear facilities asem amak.

Yamaji amakba sülen Iran nunger ozüng yanglurtemi IAEA den amalitep rakdang aser Grossi-i Fordow nung ali telung nung enrichment plant densema facilities semdangtsü asüngdangba memela.

"Asenoki yangji kechi ali, kong ali, aser kechi atalok, aji meteta alitsü nüngdaker," ta Grossi-i ashi.

Anogo 12 raraba mapang linük tesem balala nung civilian 627 asü ta Iranian Ministry of Health ajanga ashir aser Iran-i tayang kepzüka amakdang Israel nunga nisung 28 tepset ta Israel ketdangsür temi ashir.

Israel-i June 23 nü Tehran nung aliba Evin Prison nung missile ka khaloktsüba nung military recruits, pua alirtem aser tesemdangertem densema nisung 71 tepset, ta Honibarnü Iran indang judiciary ajanga ashi.

## Israel-i Gaza amakdang nisung 81 tepset

**Jerusalem, Aami/June 29 (Agencies):** Israel-i Gaza tesem balala nung Honibarnü anüngdang teroto tashi ghonda 24 amakba nung Palestine nunger 81 tepset aser 400 dak tema yirutsü, ta Hamas meyong health ministry ajanga ashi.

Gaza City nung stadium ka anasa amakba nung tanur densema nisung 11 tepset, ta Al-Shifa hospital ketdangsür temi ashi. Iba stadium ya tesem balala nungi arua süki yanglur jenoka alirtemi amshia liasü.

BBC ajanga jangjaba footage nunga nisungtemi teka aser kotarang amer lisem yapoka nisung bushitepa liasü.

Israel mitkar temi par sepai asoshi lendong lir ta temulung melemtet aliba nisung ka dak alaka yangji nisung yiruba indangbo memetet ta ashir.

Kasa mapang US Tir Donald Trump-i taruba hopta nung ceasefire ka züngzükteptsü imlar ta ashir.

Israel aser Iran tsüngta anogo 12 rara tembanga ceasefire sangdongba sülen US-i nungshiba ajanga tezüngzüktep ka yanglutsü imlar ta Qatari mediators temia ashir.

March ita Israel-i Gaza nung asendenshir amakba ajanga ita ana ceasefire raksa. January 19 nungi tenzükba ceasefire nungya shilem asem liasü, saka shilem kata majangtet.

Shilem tanabuba nung teti atema ceasefire, Gaza nung pua bener oa aliba takum alirtem meyiptsütsü aser iba melen



Israel nung tepuokdak aliba Palestine nunger chioktsü aser Gaza nungi Israel sepai ajunga ainshitsü densema liasü.

Tetsüngtai ia yimjung ken o jembirtemi Gaza nung ceasefire tasen tenzüksü aser pua alirtem chioktsü asoshi asendenshir jembishinür, saka Israel den jembishinüba nung telemtetba kati marui anendaka lir, ta Hamas ketdangsür kati Brehostibarnü shia liasü.

Gaza nung Hamas-i pua aliba Isreli hostages tanüngba chioktsü asoshi tezüngzüktep ka yangluang ta Honibar nikongdang Tel Aviv nung rally ka ayongzüka liasü. Iba rally ayongzüker temi khen nung rara tembanga nisung ajak kidangi anir arutsü mapang tongogo ta ashir.

Kasa mapang Israel-i Gaza nung amakba manener. Hukulbar nikongdang Gaza City nung aliba Palestine Stadium

anasa amakba nung nisung 11 asü, ta mozüki ketdangsür temi ashi.

Onok mentepa lia ajungbena ola tulu adoka apokba angashi. Yangji süki agi sünga liasü aser tangbo item süki lisem agi nembanga lir. Onok teka agi ghonda aika ali yapoka liasü, ta Ahmed Qishawi-i osangbener dang ashi.

Yangi Israel mitkartemi nüngdaka aliba nisung mesüra Israel-i ashiba ama kiralongrar meliasü...yangi civilian, tanurtem alir aser onok dak taochi makai amak, ta pai ashi. Ano al-Mawasi area nung apartment block ka aser süki ka nung amakdang nisung 14 tepset ta ashir, aser yangji tanur kar liasü.

Al-Mawasi nung amakdang tanur asem aser par tsürabor tepset, shirnok mejanga liasü, ta kinunger kati Associated Press dang ashi.

"Item tanurtem yagi parnok dak kechi inyak? Parnok aibelen kechi ali?" ta tanurtem tetsü Suad Abu Teima-i osangbener dang ashi.

Honibarn nikongdang Jaffa School anasa Tuffah kiyong nung tayimtsü amshia amakba nunga nisung kar asü ta ashir.

Yangji tanur pongu densema nisung ti tepset, ta Palestinian health ministry ajanga ashi.

Tuffah kiyong nung amakba indang asüngdang dang, northern Gaza Strip nung aliba IDF sepai asoshi lendong lir ta temulung melemi aliba nisung ka dak amak, ta Israel Defence Forces (IDF) ajanga ashi.

"Mamakdang civilian tem dak mokongshitsü asoshi mera agia agiogo aser onoki tenük yoker amakba nisung dak alaka dangar yiruba indangbo memetet," ta ashi.

Honibar nikongdang IDF ajanga sangdong ka agütsüba

nung, Hukulbarnü Gaza City kübok Sabra tesem nung Hamas indang military wing tanishir Hakham Muhammad Issa al-Issa tepsetogo, ta ashi.

IDF ajanga ashiba agi iba nisungba ya Hamas indang military wing tenteter rongnung ka lir aser Hamas indang general security council nung züngsem aser Hamas-i October 7, 2023 nü Israel amaktsü atema tasa yangluba nung tongtipang shilem agia lir.

Hamas-i anir telungpur temi Israel arütsü alema aita nisung 1,200 shi tepseter nisung 251 pua bener aoba sülen Israel mitkari Gaza nung bomb poklokja amak tenzükba nung nisung 56,000 dak tema tepsetogo.

Kasa mapang US Tir Donald Trump-i Gaza nung raraba nung ceasefire alitsü asoshi jembishinüba nung terenlok alitsü Deobarnü ayongzüka liasü.

Ato Kilonser Benjamin Netanyahu indang top adviser, Cabinet Minister Ron Dermer ya ceasefire atema jembishinütsü asoshi tan hopta Washington-i aotsü lir, ta Israel ketdangsür kati ashi.

Aruya aliba hopta nung Washington-i Netanyahu aotsü atema sentong yanglutar, ta ketdangsüri ashi.

"GAZA NUNG DEAL YANGLUANG. PUA ALIRTEM ANIR ARUNG!!!" ta Trump-i Deobarnep pa indang social media dapang Truth Social nung zülua liasü.



# Dr. T. Ao Trophy atema CDFA-i trail ayongzüka agi



**Dimapur, Aami/June 29 (TYO):** Dr. T. Ao Trophy 2025 atema Chümoukedima District Football Association-i June 27 aser 28 nü Chümoukedima Football Stadium nung trails ayongzüka agiogo.

Mezüngbuba ango district kübok tesem balala nungi asayar 130 trails atema adenshi. Parnok rongnungi asayar 50

tanabuba round atema shim, koba tananübuba agia liasü.

Tanabuba round agiba sülen training camp atema asayar 35 shimogo.

Asayartem shimba committee nung Convenor ji Vitouto Kuotsu aser züngsemtemji Khriese Terhüja, Aceu Zashumo aser Letkhokai Kuki nunger liasü.

**NFA-i XXIVbuba Dr. T Ao Trophy atema fixture June 30 nü draw asütsü**

**Dimapur, Aami/June 29 (TYO):** Nagaland Football Association (NFA)-i sangdong ka ajanga, XXIVbuba Dr. T Ao Trophy (Inter-District Football Championship) 2025 atema Fixture ya June 30 nü Indira Gandhi Stadium, Kohima nung 12:30 ako nungi tenzüka draw asütsü ta metetdaksüogo.

Iba asayamung ya Nagaland

Football Association-i ayongzüker aser Kohima District Football Association (KDFA)-i host süa August 1 nungi 15 tashi asayatsü.

Iba dak sendakba nung NFA züngsem District Football Associations 17 prongla aser Tournament Technical Committee züngsem ajak dang iba sentong nung tamakok

maludaktsüi arua shilem agitsü metetdaksüogo.

Organizing Committee züngsem ajak aser XXIVbuba Dr. T Ao Trophy (Inter-District Football Championship) 2025 indang S u b - C o m m i t t e e s representative tem danga iba sentong nung shilem agitsü mepeshia metetdaksüogo.

## Mbeumo atema Man Utd-i £62.5m bid asüba Brentford-i magizük



**Aami/June 29, 2025 (Agencies):** Manchester United-i sen ajungketer Bryan Mbeumo atema pound million 62.5 bid asüba Brentford-i magizük.

United-i arishi küm 25 tain asayar atema ya pound million 55 den add-ons pound million 7.5 bid süa liasü.

Iba ita tetenzüklen parnoki Cameroon nunger forward atema ya pa pound million 45 den add-ons pound million 10 bid süa liasü, saka magizük.

Wolves nung forward Matheus Cunha pound million 62.5 agi alizükba sülen United puri tejaklen asayatsüpur

alizüktü merangdar.

Sources balalai ashiba agi, Brentford-i parnok indang asayar ya mayok tsüngda Cunha atema Wolves nem agütsüba kasa taahbo sa aginer. Mbeumo aser Brentford na tenanzüktepba yangluba ano küm ka anunga lir.

Mbeumo-i taoba season Brentford atema goal 20 idaktsü koba pa indang career nung tajungtiba liasü. Paisa assist teku süja liasü.

United den Mbeumo atema tanga tetoktepertema adoktsü akok, kechiyong Tottenham manager tasenba Thomas Frank-i Mbeumo den

longjemner aser iba den tanga Champions League club temia pa alizüktü jangraba sayuogo.

Mbeumo ya United goalkeeper Andre Onana den külemi Cameroon team nungi asayar aser pai club den tenanzüktepba yangluaka pa 2025-26 campaign nung hopta pezü bo masayatetsü, kechiyong Cameroon team Morocco nung Africa Cup of Nations asayatsü lir.

Cameroon team iba asayamung nung mezüngbuba asaya December 24 nü Gabon den asayatsü lir.

Mbeumo ya 2019 küm French club Troyes nungi Brentford nung aden aser iba mapang Brentford pur Championship nungang asaya liasü.

Pai club tenüng nungi tetoktepba ajak nung asaya 242 nung asayaba mapang goal 70 idaktsür lir aser 2021 küm iba west London club ya top flight-i ia asayatsü atema pai teyari tulu agüja liasü.

## China football team Coach Ivankovic mapa nungi anentsüogo



**Aami/June 29, 2025 (Agencies):** 2026 World Cup atema qualifiers nungi tsükba sülen China indang national football team coach Branko Ivankovic mapa nungi anentsüogo, ta Chinese Football Association-i metetdaksü.

China team taruba küm United States, Mexico aser Canada nung team 48 asayasü aliba World Cup atema continent preliminaries nung Group C nung pongububa nung tembangba sülen arishi küm 71 tain Croatia nunger coach ya mapa nungi anenja liasü.

"Tebur national team den inyakba mapang bendanga agüja inyakba atema aser China nung football asaya terenlok atema teyari agütsüba asoshi Chinese Football Association-i Branko Ivankovic aser pa indang coaching staff dang kanga pelar," ta CFA sangdong ka ajanga metetdaksü.

"Ivankovic taruba mapa aser taküm nung takok nguyonga aotsü imlaja atar," ta kasa sangdong ajangsa metetdaksü.

Ivankovic shiba lenisüba nung Iran team 2006 küm Germany nung World Cup asaya liasü, pa 2024 küm February ita China team coach asütsü shim aser pai Aleksandar Jankovic melen. Pa lenisüba nung China team Asia's World Cup qualifying tasembuba phase-i ia liasü.

Par team Japan den asaya goal 7-0 agi makokba densema junga metenzüktepba sülen asendenshir tajungba asaya-a WC atema qualify asütsü timla liasü.

Indonesia aser Bahrain na akokba sülen China team qualifying round pezübuba atema timla liasü, saka Japan, Saudi Arabia aser Australia makokba den June 5 nü Indonesia makokba sülen parnok tsükogo.

Chinese Football Association-i ashiba agi, Dejan Djurdjevic shibai China team February ita Under 20 Asian Cup nung quarter-finals tonga ania liasü, pa lenisüba nung taruba ita linük team South Korea nung East Asian Championship nung asayatsü.

## US Open Badminton: Tanvi aser Ayush na final-i iogo

**Aami/June 29, 2025 (Agencies):** India nunger lanur asayar Tanvi Sharma aser Ayush Shetty nati US Open Badminton Tournament nung maneni kanga junga asaya-a pei tata semifinal asaya koka final tongogo.

Arishi küm 16 tain unseeded Tanvi Sharma-i tetsür kija asaya semifinal nung Ukraine tsür seventh seed Polina Buhrova 21-14, 21-16 agi straight games nung kokogo. Tena tsüngda asaya minute 34 dang asaya aser Tanvi-i tang agi tanabenbuba Buhrova madak takok nguogo.

La asoshi final asaya kanga

melarabo masütsü, kechiyong la top seed United States tsür Beiwen Zhang den asayatsü lir.

Kasa mapang nung tebur kija asaya semifinal nung fourth-seeded Ayush Shetty-i Chinese Taipei nunger top seed aser world No. 6 Chou Tien Chen kokogo. Mezüngbuba game tera agi makokba sülen Ayush-i tanungba game ana kanga junga asaya 21-23, 21-15, 21-14 agi asaya koka liasü. Tena tsüngda ghonda ka dak tema asaya liasü.

Pa final nung Canada nunger third seed asayar Brian Yang den asayatsü, shibai tanga semifinal ka nung Chinese

Taipei nunger asayar Liao Jhuo-Fu 21-10, 21-12 agi koka liasü.

India nunger asayar ana yagi quarterfinals nunga kanga junga asayaago. Tanvi-i quarterfinals nung la dang nungi temaba jenjang nung aliba Malaysia tsür Karupathevan Letshanaa 21-13, 21-16 agi ako aser Ayush-ia Chinese Taipei nunger junior world champion Kuo Kuan Lin 22-20, 21-9 agi koka liasü.

Tanvi aser Ayush naprongla iba asayamung title abentsü atema asaya kaka dang akoktsü nüngdaka lir aser tenapronglai takok tajung angutsü timla tulu lir.

## BILEMDANGANG

"Kinünger aika dang nungi chichiba medemer ka ali tajungba."